

Nalunaarsukkamik inooqatigiinneq il.il. pillugit inatsisip allanngortinneqarneranik inatsisip Kalaallit Nunaannut atortuulersinneqarneranik peqqusut

UAGUT MARGRETHE AAPPAAT, Guutip Saammaanneranik Danmarkip Dronningia, imaaliopugut:

Nalunaarsukkamik inooqatigiinneq pillugu inatsisip allanngortinneqarneranik inatsimmi nr. 360-mi 2. juni 1999-meersumi § 3 (Nalunaarsukkamik inooqatigiilernissamut nalunaarsukkamillu inooqatigiit qitornassamik qitornavissiarthaarsinnaaner atortuulersinneqarnerat) pillugit inatsisip allanngortinneqarnerat) aamma aappariilersarneq aappariikkunnaartarneq pillugit inatsisip allanngortinneqarneranik inatsimmi nr. 446-mi 9. juni 2004-meersumi § 12 inatsisillu assigiinngitsut allat (Ilaqutariinnermut il.il. tunngasutigut malittarisassanik oqilisaaneq) naapertorlugit aalajangersarneqarpoq inatsisip Kalaallit Nunaannut atuutinneqassasut. Taamaalilluni nalunaarsukkamik inooqatigiinneq pillugu inatsip Kalaallit Nunaannut atuutissaaq ima oqaasertaqarluni:

§ 1. Inuit marluk suaassuseqatigiit (arnaannaat/angutaannaat) inooqatigiinnerminnik nalunaarsuisitsisinnaapput.

Nalunaarsuineq

§ 2. Aappariinneq pillugu Kalaallit Nunaannut inatsimmi kapitali 1 aamma 2 inooqatigiinnermik nalunaarsuinnermi taamatulli atuutissapput, §§ 13-15, § 18, imm. 3, aamma § 20, imm. 1 eqqaasann-gikkaanni. Taamaattoq inooqatigiinnermik nalunaarsuinnermi imm. 2-mi piunasaqaatit naammassinneqarsimassapput.

Imm. 2. Inooqatigiinneq aatsaat nalunaarsortinneqarsinnaavoq,

- 1) inooqatigiit arlaat Kalaallit Nunaanni Danmarkimiluunniit najugaqarpat danskisullu innuttaassuseqarluni, imaluunniit
- 2) inooqatigiit marluullutik nalunaarsortinnginnermi ukiut marluk kingulliit Kalaallit Nunaanni Danmarkimiluunniit najugaqarsimappata.

Imm. 3. Norgemi, Sverigemi, Finlandimi Islandimiluunniit innuttaassuseqarneq imm. 2 malillugu danskisut innuttaassuseqarnermut naligiisinneqassaaq. Norgemi, Sverigemi, Finlandimi Islandimiluunniit najugaqarneq imm. 2 malillugu Kalaallit Nunaanni Danmarkimiluunniit najugaqarnermut naligiisinneqassaaq. Inatsiseqarnermut ministerip aalajangersinnaavaa, nalunaarsukkamik inooqatigiinneq pillugu nunami allami kalaallit inatsisaannut napertuuttunik inatsiseqartumi innuttaassuseqarneq danskisut innuttaassuseqarnermut taamatuttaaq naligiisinneqassasoq. Aammattaq inatsiseqarnermut ministerip aalajangersinnaavaa, nalunaarsukkamik inooqatigiinneq pillugu nunami allami kalaallit inatsisaannut napertuuttunik inatsiseqartumi najugaqarneq Kalaallit Nunaanni Danmarkimiluunniit najugaqarnermut naligiisinneqassasoq.

Imm. 4. Inooqatigiinnermik nalunaarsuinnermi periaasissaq pillugu malittarisassat inatsiseqarnermut ministerimit aalajangersarneqassapput.

Inatsisitigut sunniutit

§ 3. Inooqatigiinnermik nalunaarsuineq, § 4-mi allasimasut kisiisa ilanngunnagit, aappariilerner-tulli inatsisitigut sunniuteqassaaq.

Imm. 2. Inatsisini, aappariinnermut aappariinnullu tunngasuni, aalajangersakkat nalunaarsukkamik inooqatigiinnermut nalunaarsukkatulli inooqatigiinnut taamatulli atuutissapput.

§ 4. Aappariit pillugit malittarisassat qitornavissiarthaarneq pillugu Kalaallit Nunaannut inatsimmiittut nalunaarsukkamik inooqatigiinnut atuutinnngillat. Taamaattorli nalunaarsukkamik inooqataa-

sup inooqammi qitornaa qitornavissiarisinnaavaa, qitornavissiaq nunami allameersoq pineqanngippat.

Imm. 2. Aappariit pillugit namminersorsinnaanermik Kalaallit Nunaannut inatsimmi § 12, oqaaseqatigiit pingajui, aamma § 14, imm. 3 nalunaarsukkamik inooqatigiinnut atuutinngillat.

Imm. 3. Inatsisini, aappariinnermi aappaasoq suaassusiatigut taasaq pillugu malittarisassanik imikkut ittunik imalinni, aalajangersakkat nalunaarsukkamik inooqatigiinnut atuutinngillat.

Imm. 4. Nunat tamat akornanni isumaqatigiissutini aalajangersakkat nalunaarsukkamik inooqatigiinnut atuutinngillat, isumaqatigiissummi atsioqataasut tamatumunnga isumaqataareersimangippata.

Atorunnaarsitsineq

§ 5. Aappariinneq pillugu Kalaallit Nunaannut inatsimmi kapitali 3-6 aamma Kalaallit Nunaanni eqqartuussisarnermik inatsimmi kapitali 27 nalunaarsukkamik inooqatigiinnermik atorunnaarsitsinnermi taamatulli atuutissapput, taamaattoq tak. imm. 2 aamma 3.

Imm. 2. Aappariinneq pillugu Kalaallit Nunaannut inatsimmi § 35, imm. 1 nalunaarsukkamik inooqatigiinnermik atorunnaarsitsinnermi atuutissanngilaq.

Imm. 3. Inooqatigiit arlaannaalluunniit nunami § 2, imm. 3-mi ilaatinneqartumi najugaqanngippat, Kalaallit Nunaanni nalunaarsukkamik inooqatigiilerneq, Kalaallit Nunaanni eqqartuussisarnermik inatsimmi § 283, imm. 1 apeqqutaatinnagu, Kalaallit Nunaanni tamatigut atorunnaarsinneqarsinnaavoq.

Atortuulersitsineq

§ 6. Peqqussut atortuulissaaq ulloq 1. juni 2009, taamaattoq takuuk imm. 2-3.

Imm. 2. § 5, imm. 1 atortuulissaaq ulloq 1. januar 2010. Tamatuma tungaanut aalajangersagaq ima oqaasertalerneqassaaq: Aappariinneq pillugu inatsimmi kapitali 3-6 aamma Kalaallit Nunaanni eqqartuussisarnermik inatsimmi kapitali 4, immikkoortoq D taamatulli atuutissapput nalunaarsukkamik inooqatigiinnermik atorunnaarsitsinnermi, taamaattoq tak. imm. 2 aamma 3”.

Imm. 3. § 5, imm. 3 atortuulissaaq ulloq 1. januar 2001. Tamatuma tungaanut aalajangersagaq ima oqaasertalerneqassaaq: ”Inooqatigiit arlaannaalluunniit nunami § 2, imm. 3-mi ilaatinneqartumi najugaqanngippat, Kalaallit Nunaanni nalunaarsukkamik inooqatigiilerneq, Kalaallit Nunaanni eqqartuussisarnermik inatsimmi kapitali 4, immikkoortoq D, § 16 apeqqutaatinnagu, Kalaallit Nunaanni tamatigut atorunnaarsinneqarsinnaavoq”.

Imm. 4. Najoqqutassat, inatsit malillugu suliaasut, Kalaallit Nunaannut atuutinngillat.

§ 7. Naalagaaffimmik takornartamik isumaqatigiissuteqarnikkut imaluunniit inatsiseqarnermut ministerimit malittarisassiortoqarsinnaavoq, nalunaarsukkamik inooqatigiinneq pillugu Kalaallit Nunaata naalagaaffiullu allap akornanni inatsisitigut pissutsit pillugit.

Amalienborgimi tunniunneqarpoq, ulloq 15. maj 2009

Kunngiussutitsinnik Atsiorpugut Naqissusiillutalu

MARGRETHE R.

/Lars Løkke Rasmussen